

65

23. apríl

5. gr.

$\frac{4}{5}$ hlutum af vöxtum sjóðsins skal árlega varið samkvæmt fyrirmælum 3. gr., en $\frac{1}{5}$ hluti vaxtanna leggist jafnan við höfuðstól sjóðsins, þar til hann er orðinn kr. 50000.00 — fimmtíu þúsund krónur —, en þegar svo er orðið, skal úthluta öllum vöxtum árlega samkvæmt 3. gr.

Stjórn sjóðsins skipa:

6. gr.

1. Skólastjóri skóla Ísaks Jónssonar, Reykjavík, og er hann formaður sjóðstjórnarinnar.
2. Skólanefnd skóla Ísaks Jónssonar skipar annan sjóðstjórnarmeðlim (karl eða konu) og skal sá maður eða kona vera einhver af ættingjum eða venzlamönnum gefendanna, ef völ er á.
3. Þriðji meðlimur sjóðstjórnar skal vera fræðslumálastjóri, eða sá maður, er síðar kann að gegna því hlutverki, er fræðslumálastjóri nú gegnir.

Skólastjóri skóla Ísaks Jónssonar skal jafnframt vera gjaldkeri sjóðsins.

Fari svo að skóli Ísaks Jónssonar verði lagður niður, ákveður síðasta löglega kosin stjórn sjóðsins í samráði við borgarstjóra Reykjavíkur, til hvaða líknarstarfsemi sjóðurinn skuli ganga, samkv. tilgangi gefendanna, og þannig að aðeins $\frac{4}{5}$ af árlegum vöxtum hans sé úthlutað í styrktarfé, þar til sjóðurinn nemur kr. 50000.00. Jafnframt ákveður þessi síðasta löglega stjórn sjóðsins, hverjir skuli skipa hina nýju stjórn sjóðsins.

7. gr.

Sjóðstjórnin sér um reikningshald sjóðsins og skulu endurskoðendur vera hinir sömu og þeir, er kosnir eru til að endurskoða reikninga skóla Ísaks Jónssonar.

Reikningsár sjóðsins er frá 1. júní ár hvert til jafnlengda næsta ár.

Verði skóli Ísaks Jónssonar lagður niður annast endurskoðendur bæjarreikninganna árlega endurskoðun sjóðsreikninga. Reikningar sjóðsins skulu árlega birtir í B-deild stjórnartíðindanna.

8. gr.

Leita skal forsetastaðfestingar á skipulagsskrá þessari og um leið fellur úr gildi skipulagsskrá Vöggustofusjóðs Ragnheiðar Sigurbjargar Ísaksdóttur.

Reykjavík, 30. október 1956.

Ísak Jónsson. Sigrún Sigurjónsdóttir.

66

24. apríl

REGLUGERÐ

um breyting á reglugerð nr. 87 15. júní 1954, um orlof og veikindaforföll starfsmanna ríkisins.

1. gr.

1. gr. reglugerðarinnar orðist svo:

Starfsmenn ríkisins skulu árlega fá orlof í 18 virka daga og einskis í missa af föstum launum.

Nú hefur starfsmaður verið í þjónustu ríkisins 10 ár eða lengur, og skal hann þá fá orlof sem hér segir:

- a. Í 21 virkan dag, ef hann á að baki 10—15 ára þjónustualdur.
- b. Í 27 virka daga, ef hann á að baki lengri þjónustualdur en 15 ár.

Orlofsárið telst frá 1. júní til 31. maí næsta ár á eftir.

2. gr.

66

Reglugerð þessi, sem sett er samkv. lögum nr. 38 1954, um réttindi og skyldur starfsmanna ríkisins, og lögum nr. 14 1957, um breyting á þeim lögum, öðlast þegar gildi.

Fjármálaráðuneytið, 24. apríl 1957.

Eysteinn Jónsson.

Sigtr. Klemenztson.

Staðfesting forsetans á skipulagsskrá fyrir Minningarsjóðs Pálma rektors Hannessonar, útgefin á venjulegan hátt að mandatum af dómsmálaráðherra 24. apríl 1957.

Skipulagsskráin er þannig:

SKIPULAGSSKRÁ

Minningarsjóðs Pálma rektors Hannessonar.

1. gr.

Sjóðurinn heitir Minningarsjóður Pálma rektors Hannessonar. Hann er stofnaður af kennurum og nemendum Menntaskólans í Reykjavík, Nemendasambandi Menntaskólans og fleiri aðilum.

2. gr.

Hlutverk sjóðsins er að verðlauna nemendur Menntaskólans í Reykjavík eða aðra fyrir vel unnin störf á sviði íslenzkrar náttúrufræði, fræðum íslenzkrar tungu eða á sviði tónlistar svo og veita hæfileikamönnum styrk til framhaldsnáms í þessum greinum.

3. gr.

Stofnfé sjóðsins, sem nemur nú kr. 50000.00, svo og það fé, er síðar kann að renna til hans, skal ávaxta, og ef unnt er, á þann hátt, að rýrnun á verðgildi peninga hafi ekki áhrif á eignir sjóðsins.

4. gr.

Stjórn sjóðsins skipa fimm menn: rektor Menntaskólans í Reykjavík, aðalnáttúrufræðikennari skólans, umsjónarmaður skólans (inspector scholae), einn maður, nefndur af eiginkonu og niðjum Pálma Hannessonar, og einn maður, nefndur af Nemendasambandi Menntaskólans.

5. gr.

Stjórn sjóðsins annast varðveislu eigna hans og ávöxtun þeirra í samræmi við ákvæði 3. gr.

Stjórnin ákveður, hver eða hverjir skuli hljóta verðlaun eða styrki úr sjóðnum. Í sambandi við úthlutun úr sjóðnum getur stjórnin efnt til samkeppni í greinum þeim, er getur í 2. gr., og síðar leitað álits sérfróðra manna um verk þau, er kunna að berast.

Úthlutun úr sjóðnum fer fram, þegar sjóðstjórnin telur ástæðu til, þó ekki oft en einu sinni á ári, og eigi má verja meira en þrem fjórðu hlutum ársvaxta í þessu skyni. Hinn hluta vaxtanna skal leggja við höfuðstólinn, sem aldrei má skerða.